



Biren Singh-i COVID-19 atema rongdak senden ayonga amen

Artsü anasa Russian sepai 100,000 lir: Ukraine



VOL. XVIII NO. 208 (ADOK 208) DIMAPUR

YANGTEPNÜ (THURSDAY)

MONUPII (MAY) 13, 2021

₹ 5.00

COVID-19 Nagaland: Nisung timtiba dak putet; 9 asü

May 14 tashi Kma & Dmr nung tenokdangbatem atsülanger

Kohima, May 12, 2021 (TYO): Bodbarnü Nagaland nung nisung timtiba dak COVID-19 aliba putetogo. Tanü nisung 338 dak putetba züngsema nisung ajak agi 16,890 kümogo aser nisung 9 asüba züngsema tasür ajak agi 165 kümogo.

"Tanü nisung 338 dak COVID-19 putet. Parnokji Dimapur nung 184, Kohima nung 87, Tuensang nung 18, Mon nung 15, Mokokchung nung 9, Longleng, Kiphire o Phek nung trokrok (6), Zunheboto nung 3 aser Wokha o Peren nung anana (2) lir" ta Health & Family Welfare Minister, S Pangnyu Phom-i metetdaksü.

"Nisung 16,890 rongnungi 12,877 taneptsü nguogo aser tang nisung 3,297 anepaludar. Nagaland nung taneptsü angur 76.24% dang kümogo" ta paisa ashi.

Tanü Dimapur nung nisung 6, Kohima nung 2 aser Phek nung 1 asüba züngsema COVID-19 puteta alir tasür ajak agi 164 kümogo, saka parnok 11 bo tanga tashidak ajanga asü, ta Minister Pangnyu-isa metetdaksü.

Nagaland nung nisungtem dak COVID-19 kanga putetba agi

sorkari May 3 nü Kohima aser Dimapur kübok tesem kar containment zone kübok dendaksüba ozüng May 14, 2021 aonung 6:00 ako tashi atsülangogo.

Anogo tenetnü containment zone mapang ya May 5 aonung 7:00 ako nung tembangsüba liasü. Ajisüaka, Principal Secretary (Home) R Ramakrishnan-i Kohima aser Dimapur Deputy Commissioner tem dangi shidi ka nung May 14 aonung 6:00 ako tashi mapang atsülangba osang metetdaksüogo.

Mongulbar tashi nung Nagaland nung nisung 1,81,443 nem COVID-19 vaccine indang dose 2,30,093 agütsüogo, ta State Immunization Officer Dr Ritu Thurr-i metetdaksü.

Vaccine agirtem rongnung frontline workers 52,156, healthcare workers 15,155 aser arishi küm 45 ser temapur 1,14,132 lir, ta paisa ashi.

Nisung 51,379-i vaccine indang dose anaprong agiogo aser parnokji front-line workers 27,287, healthcare workers 10,016 aser arishi küm 45 ser temapur 14,103 lir, ta Dr Thurr-isa metetdaksü.

Nagaland nung summer vacation atsülanger

Dimapur, May 12, 2021 (TYO): Nagaland nung sorkar aser nija school ajak nem summer vacation May 21, 2021 tashi atsülanger, ta Principal Director,

Shanavas C, IAS-i Bodbarnü metetdaksüogo.

Iba mapang kaketshir aaliba hostel ajak summer vacation atema shibangtsü, ta paisa ashi.

Dimapur nung NSCN (IM) züngsem 2 apu; civilian 2 kümzük



Dimapur, May 12, 2021 (TYO): May 9, 2021 nü Dimapur nung sepaitemi police den yaritepa NSCN (IM) züngsem ana apu aser apuani ka kümzük.

NSCN (IM) nung Kilonser kati tetuyuba agütsüba nung ajemdaker NSCN (IM) züngsemtemi apuani na ya Nagaland Gate anasa apuba liasü. Ajisüaka, sepaitem aser police-i Dimapur Govt College lenjem anasa tena kümzük aser

telungpur ana apu. NSCN (IM) züngsem ana ket nung point 32 Pistol ka, point 32 injang round 3, mobile phone ana aser taitüsü aketba kulikatterem ngutetogo.

Sepaitemi tawa mapa inyaka arudang NSCN (IM)-i tashiyim agi sen meshiba aser sen magütsüba civilian tem apuba bushitetogo.

NSCN (IM) züngsem anaji West Police Station, Dimapur District ket nung agütsüogo.

Dimapur district nung 'total lockdown' atema metetdaksür

Dimapur, May 12, 2021 (TYO): Dimapur district nung hopta ka total lockdown asütsü atema Deputy Commissioner Rajesh Soundararajan, IAS-i tetuyuba kar metetdaksüogo.

May 14 aonung 6:00 ako nungi May 21, 2021 tashi total lockdown asütsü aser iba mapang temelaba agütsür dak alaka tanüngba nisungtem senzüsönongba noktanger ta pai ashi.

Points of Entry ajak nung mita anütsü aser Dimapur District nung non essential movement memelatsü, ta Deputy Commissioner-isa metetdaksüogo.

Temetetsütem:

- # Tenokdangba mapang essentials commodities/food items aser medical supplies abenba garitem senzütsü.
- # Animal healthcare dena healthcare workers, COVID-19 vaccine agütsüpur aser tendangtsüpurtem medical emergencies atema senzütsü melar. Pharmacies, Clinics, Hospitals, Nursing Homes lapoktsü.
- # 4 lane aser railway maparen inyaksü melar.
- # Anepdang 6:00 ako nungi anüngdang 12:00 ako tashi Marwaripatti, Murgipatti nung aliba wholesale dokantem, aonsotsü, ango/shi ayokertem, milk booths, bakeries, local grocery stores, animal feed shops ajak lapoktsü melar. Village/ward/colony ketdangtsürtemi itemji reprangshimtsü.
- # New market nung aliba 'essential commodity' dokantem Odd - Even inyakyim nung anogo melentepa lapoktsü.
- # Supermarket/footpath vendors ajak shibangtsü aser parnokji pei pei colony/yimtsüngtem nung ayoktsü.
- # Petrol pump ajak lapoktsü saka nisung aika

mesentepdaksütsü.

Nisung anenzükba hotel tem nung staff ajemer lapokdaksütsü. Dimapur nung hotel/guest house amala nung anenzükertemi COVID-19 negative test bener arutsüla. Restaurants shibangtsü saka home delivery services agütsütsü akok.

Food delivery, groceries delivery aser tanga e-commerce service providers melar.

Electronic & print media, telecom/internet service providers nung inyakerterem senzütsü melar.

Dimapur airport lapoktsü aser COVID-19 inyakyim benshia staff aser passengers (with proof of ticket) senzüdaksütsü.

Asüpila sentep sentong nung nisung 20 tema madenshidaksütsü.

Lokti adenshiba tesem ajak shibangtsü aser kiyimba sentong dak alaka tanga sentong kecha magidaksütsü. Kiyimba sentong atema jelia district task force dang nungi temelaba meshitsüla aser nisung 20 dang adenshitsü melar.

District Administration, Police, security forces, District Court, Fire & Emergency Services, Medical, Postal, NIC, NSDMA, Home Guards and Civil Defence, SDRF, Power, PHE, Food & Civil Supplies, Treasury & Accounts, Taxes, banks/ATMs, IPR, AIR and Doordarshan, Social Welfare Department including Functioning of Sakhi One Stop Centre, Women Helpline, Child Protection services, Anganwadi services, LPG services including their delivery, distribution and transportation, Private water tanker/ carriers, Prison and related services Courier Services, Dimapur Municipal

Council, Chumukedima/ Medziphema/ Niuland Town Council, Food Corporation of India Ltd, Power Grid Corporation of India limited ketdangtsür aser staff senzütsü melar.

Agriculture & allied activities den construction maparen inyaksü melar saka contractor/kiburi mapa inyaker nem COVID-19 inyakyim benshidaksütsüla. Ajisüaka, tanga state tem nungi aayangertem anir arutsü memelar.

Nija aser public transport garitem senzütsü memelar aser medical emergencies nung 50% dang amentsü aser COVID inyakyim sülen anidaksüla. Tanga nungdak kar adokra district task force nungi temelaba meshir ang senzütsüla. Medical emergency mapang shiranger/teyariteper aniba dak alaka public transport service - bus, taxis, autorickshaws, Two wheelers taxi senzütsü memelar.

Tangalen nungi Dimapur-i arurtemi Negative COVID-19 test Report (RT-PCR/ TruNat/CBNAAT) mesüra COVID-19 Vaccination Completion Certificate bener arutsüla.

Iba tetuyuba alema inyakerterem Disaster Management Act 2005 nung arlla 51 nungi 60 aser IPC arlla 188 kübok temerenshi alitsü, ta DC Rajesh Soundararajan, IAS-isa metetdaksüogo.

DIMAPUR NUNG NABARD SHIBANGTSÜR:

Dimapur DC aser DDMA Chairman-isa tanga sangdong ka nung National Bank For Agriculture and Rural Development (NABARD) 4th floor NSCB Building, Kharmahal, Circular Road, Dimapur ghonda 48 shibangtsüba osang metetdaksüogo.

DALT-i Covid rara anema longjemer noktaksü ayongzüker

Dimapur, May 12, 2021 (TYO): Dimapur Ao Lanur Telongjem (DALT)-i Covid wara anema rara nung frontline workers ajak nem tenüngsang agütsüba den nisung ajak longjemer iba rara nung noktaksü ayongzükerogo.

Medical fraternity, electricity department, ambulance services, arogo aser civil teloktem, police & civil administration den town aser yimtsüng ketdangtsür ajak dang pelaba metetdaksür, Media Cell, DALT sangdong ka nung ashi.

"Nagaland nung alirtem aser talisa Dimapur nung alirtem dang iba rara nung külemi takok angutsü atema Standard Operating Procedures (SOPs) sülen anidaksü maneni mepishir. Covid agi shiranger asütsü akok ta temolung melemer ajaki pei sasa medical ketdangtsürtem nem osang sangoktsütsü aser

parnok nungi teyari agütsü mepishir" ta DALT-isa metetdaksü.

"Iba rara anema inyakba nung tetsükdaksü tulutibaji lokti nungi Covid aketerem balaka mesenmetua amshiba lir anungji asenoki iba tangatetba ya agiendi" ta parnokisa ashi.

"Tesüiba hopta ishika tsüngda Dimapur nung aliba wholesale market nung jenjang kanga tuogo aser iba ajanga nübertemi timtem ajurur. Tarutsü anogotem ano jenjang ajungkettsü akok anungji district administration-i osettsüset jenjang aser talisa essential commodities indang jenjang reprangshimtsü mepishir" ta DALT-isa ashi.

Ano, Dimapur nung oxygen cylinders aser regulator agi meperiba osang angazüker anungji District Administration-i nungdakba peritsütsü atema

ayongzüker, ta parnokisa shisem.

"Nagaland police-i ozüng alema inyaksangshi balala azüoka aruba atema tenüngsang agütsür. Maneni, Dimapur nung ozüng alema inyakba tajungba azüoktsü atema state sorkari Dimapur kübok tongtipang tesemtem nung CCTVs peria enoktsü ayongzüker. Dimapur nung Assam den arrtsütepa aliba tesem aika lir aser item lenmang ajanga ozüng alema inyakerterem zübazüba arur. Talisa, ibala tesemtem nung electronic devices amshia menükra, Covid anema tenokdangba agütsüba ya takok ngua meinyaktetsü" ta DALT-isa metetdaksüogo.

Covid anema rara nung DALT-i akokba tashi sorkar department tem aser tanga civil teloktem den külemi yariteptsü, ta Media Cell sangdong nungsa ashi.

HAPPY 75TH BIRTHDAY



Mr. K Bendang Longchar (Nokpu)
Tasoba anogo: May 13, 1946

Nü tasoba anogo amongtsüba ya kanga temoatsü tulu lir. Ano maneni nü taküm nung teti tepela, anema aliba taküm aser arishi talang moajangma ta sarasademtsür. Nü tongmelang, ochi aser temulung lemtetba taküm ya onok ajak asoshi moatsüba sempet lir. Tsüngremi ano maneni nü nem tesümgangtsü temoatsü küm aika moajangma. Happy Birthday !

Apijemtsü Shin 9:11, " Ne nü arishi anogotem aika kümdaktsür aser nü taküm nung arishi kümtem sükloktsütsü."

- Temeim kinungtsü, Chirnur, anük-apang & semchirtem.

COVID-19 mechi Mon nung ki-o-jen kar shibangtsür

Dimapur, Monupii/May 12 (TYO): COVID-19 tashidak wara prokshia aoba azüoktsü atema tapet mera agitsü mechi Konyak Baptist Church Office Building, Mon Town ya ghonda 48 atema shibangja atar, ta Deputy Commissioner, Mon, Thavaseelan K, IAS ajanga May 10, 2021 nü sangdong ka nung metetdaksü.

Iba totuyuba nung aibelener kar danga lira, Disaster Management Act 2005 indang Section 51 nungi 60 aser Indian Penal Code indang Section 188 nung mela aliba ama merenshitsü, ta

sangdong ajanga ashi. Maneni Deputy Commissioner, Mon, Thavaseelan K, IAS ajangasa sangdong danga ka nung Mon jila kübok ki kar shibangtsütsü metetdaksü. COVID-19 tashidak prokshia aoba azüoktsü atema mera balala agitsü atema tsünglanglen agüja aliba ki shibangtsüogo:

- i) House No.92, Techahan Ward.
- ii) House No.72 Ground Floor, Shantham Ward.
- iii) House No. 121, Shantham Ward.
- iv) House No. 297, Wagiem

Ward near Old Telecom Office.

v) House No. 29(Ground Floor), Shamnyu Ward near KSU Office.

vi) House No. 118, Chingai Ward.

Tarutsü nung osang ka magütsü tashi item ki ya shibanga alitsü.

Iba totuyuba nung aibelener nem Disaster Management Act 2005 indang Section 51 nungi 60 den Indian Penal Code indang Section 188 nung mela aliba ama temerenshi alitsü, ta sangdong ajangasa ashi.

Tuensang nung ki-o-jen kar shibangtsür

Dimapur, Monupii/May 12 (TYO): Nüburtem tashidak wara nungi kumzüka ayutsü mechi aser COVID-19 tashidak nungi jenbuttsü mechi ki-o-jen kar shibangja atar, ta Deputy Commissioner & Chairman, District Task Force for Covid-19, Tuensang, Kumar Ramnikant IAS ajanga sangdong ka nung metetdaksü.

Shibangtsüba ki-o-jen tem yamai alitsü:

- 1. H/No 254, Old Medical A

- 2. H/No. 260, Bazar A, near Fish Market
- 3. Fish Market, Stall No. 11
- 4. Shop No. 5
- 5. H/No 338, Bazar A, below Gas Agency
- 6. Blue Hill Bus aser Counter.

Ketdangtsür nungi sangdong ka magütsü mesüra ki-o-jen shibanga ayuba mapang matem tashi item ki telungi aiba/adokba memelatsü. Shibangja aliba kidang alirtem ajak sorkari

mapang shia COVID-19 tashidak dak sendakba teinyaktsü/mera balala sangdonga aliba sülen anidaktsüla, ta sangdong ajanga ashi.

Item ki nung alirtem atema jang-o-tzü/nüngdakbatem pei Ward/Sector/Colony ajanga anepalutsütsü. Item totuyuba nung aibelener nem ozüng nung aliba ama temerenshi agütsütsü, ta sangdong ajangasa ashi.



Hope Channel (NGO) aser Development Authority of Nagaland, Dimapur nung inyakertem lungjemer mürekmejuba sentong ka agia liasü, kong DAN chairman, A. Nyamnyie Konyak aser Hope Channel director Tiala Amri nungera dena liasü. Pei kidang, mapa inyakba tesem aser nüburtemi amshiba tesemtem nung mürekmejua alitsü ya kanga tongtipang, ta nüburtem nung tali rajemdaktsütsü nükjidong nung iba sentong ya ayongzüka liasü, ta sangdong ka ajanga ashi.

Kiphire nung maneni tapi agi COVID-19 tendanger

Dimapur, Monupii/May 12 (TYO): Kiphire jila nung COVID-19 positive cases tali akumba ajanga Kiphire District Task Force ajanga Kiphire jila nung dokan ajunga shibangtsü totuyuba agütsü. Taoba hopta dokan kibur nisung teku dak COVID-19 positive jangjatetba aser iba tashidak prokshia aoba nungi nokdangtsü atema tsüngsü aoutsü mechi iba totuyuba ya agüja liasü, ta

sangdong ka ajanga ashi. May 12, 2021 nüa tapi agi dokan kibur dak sample tendanga liasü aser sample 86 tendangba nungi ano nisung teku dak COVID-19 tashidak jangjatet.

COVID-19 tashidak prokshia aoba nokdangtsü mechi district nung tsüngsü apuba aser tapi agi tendanga aoba maparen maneni inyaktsü, ta sangdong ajangasa metetdaksü.



Pughoboto Sub-Division administration tawabangba kübok CHC Pughoboto ajanga Pughoboto nung aliba dokan kibur aser taxi driver tem dak COVID-19 tashidak ali-mali jangjatsü atema May 12, 2021 nü tapi agi sample bendena liasü.

NSCN/GPRN ajanga jangjashitsür

Dimapur, Monupii/May 12 (TYO): Tinsulia district, Upper Assam nung aliba Pengree PO/PS kübok Inthem yimtsüng nungi Lukhula Singpho'er jabaso Anong Singpho alias Nongpion, shiba 19th Assam Rifles temi May 8, 2021 nü apu, pa ya telok yutsür jenshia senzür ka lir, ta NSCN/GPRN sangdong ka

ajanga ashi. Pa leave agiba mapang süyir duty nung tanaben arua madenba mechi Naga Army ajanga pa asoshi March 5, 2021 nü 'Warrant of Arrest' agütsü. Singpho lenirtem asoshi pa ya timtem agütsür ka ta angazüka onoki sasa bilemba lemsateper, ta sangdong ajanga ashi.

Mon nung Coffee Pulpers lema agütsü



Dimapur, Monupii/May 12 (TYO): Department of Land Resources, Mon ajanga May 12, 2021 nü coffee tsünürtem coffee tejang agizükba mapa nung anisüngzüka agütsütsü mechi coffee pulpers lema agüja liasü. Iba project ya North Eastern Council ajanga

sponsor asüba lir. Iba gol ya tajangzüka angur nem Deputy Commissioner, Mon, Thavaseelan K, IAS ajanga amokja liasü. Iba sentong nung sendaktepa Coffee Bar ka DPO Office, Mon nung amenoka liasü, koba Deputy Commissioner, Mon ajanga semzüksü.

KBCM sentep aser toklang tenzüker senden nung adener dang metetdaksür

Dimapur, Monupii/May 12 (TYO): Mon jila nung COVID-19 positive cases putetba ajanga, Deputy Commissioner, Mon, Thavaseelan K, IAS ajanga May 11, 2021 nü sangdong ka nung, May 2 aser May 9, 2021 anogotem KBCM Deobar tekülem sentep aser

Deacon Board Meeting nung adener ajak dang pei sasa mobile number 9862078993 nung osang agütsütsüla, ta metetdaksü.

Maneni ajak dang mapang ajak nung COVID-19 yimya tem amshia kidang pei sasa isolation asütsü metetdaksü.

May 21 nungi Assam Assembly session tenzüksü



Guwahati, May 12, 2021 nü Assam CM Himanta Biswa Sarma, BJP tanishir Sarbananda Sonowal aser Minister tasen kar den külemi agiba noksa nung angur.

Guwahati, May 12, 2021 (Agencies): Assam nung BJP-i aniba sorkar akümba sülen May 21, 2021 nungi Assam Legislative Assembly indang session tenzüksü.

Anogo asemnü Assembly session agidang State Assembly Speaker shimtsü ta osang ajanga ashi.

Taoba Rajya Sabha MP Biswajit Daimari-i taküm assembly election nung Paneri constituency nungi BJP ticket

amer takok angu aser pa Speaker inyaksü atema shimtsü akok.

Biswajit Daimary ya taoba Bodoland People's Front (BPF) lennir liasü aser pai Bodoland Territorial Council (BTC) election jakdang Bharatiya Janata Party (BJP) nung aden.

Assembly session nung MLA temi tezüngzüktep agitsü.

Hombarnü Srimanta Sankardeva Kalakshetra, Guwahati nung Assam chief

minister tasen Himanta Biswa Sarma-i anir minister 13-i tezüngzüktep agia liasü.

Züngsem 126 agi akümba Assam Assembly nung BJP MLA 60, Congress nungi 29, All India United Democratic Front (AIUDF) nungi 16, Asom Gana Parishad (AGP) nungi 9, United People's Party Liberal (UPPL) nungi 6, Bodoland People's Front (BPF) nungi 4 aser CPI(M) o Rajjor Dal nungi kaka lir.

Ritul Saikia'er kinungertemi Assam CM dang mepishir

Titabor, May 12, 2021 (Agencies): ULFA(I) telungpurtemi pur aoba ONGC nung mapa inyaker Ritul Saikia'er kinungertemi Bodbarnü Assam chief minister Himanta Biswa Sarma dang teyari meshiogo.

April 21, 2021 nü ONGC mapa inyaker ana den Ritul Saikia pur ao aser tanü agi anogo 22 buba menguteter.

"Onoki Assam chief minister tasen Himanta Biswa Sarma dang Ritul chioksü atema mepishiogo. Onoki pa kong lir'ar memetet. Pa ULFA(I) ket nung lira, sorkar pa chiokdaktsü atema mapa inyaksüla" ta par kinunger kati ashi.

Sepaitemi Nagaland kübok Mon district nungi ONGC nung mapa inyaker ana kümzük saka

Ritul Saikia bo mangu.

Nagaland Police aser Army yaritepa Mohini Mohan Gogoi aser Alakesh Saikia na kümzükogo.

Bodbarnü Titabor MLA Bhaskar Jyoti Baruah aser Mariani MLA Rupjyoti Kurmi nati Titabor nung Ritul Saikia'er ki semdanga par kinungertem den ajurutepe.

"Onoki chief minister Himanta Biswa Sarma den yakta ajuruteptsü aser Ritul Saikia ULFA(I) ket nung lira, pa tekaratiba nung chiokdaktsü atema jembitsü" ta MLA temi kinungertem dang ashi.

Parnokisa ULFA(I) commander-in-chief Paresh Baruah dang parnok ket nung Ritul Saikia lira chioksü ayongzükogo.

Sepaitem tsüingdang temai adoker ULFA(I) züngsem katibo ONGC nung mapa inyaker Ritul Saikia ji ULFA(I) ket nung lir ta kuli agütsüogo.

Sepaitemi Assam-Nagaland arrtsülen Ritul Saikia bushitepa maparen tulu ka tenzükogo.

Ajisüaka, ULFA(I)-i Ritul Saikia parnok ket nung aliba mesüra maliba indang osang kecha mesangdongi lir.

Assam nung chief minister tasen Himanta Biswa Sarma-ia ULFA(I) dang ozüng alema inyakba anentsü aser yimjung maparen nung shilem agitsü mepishia metetdaksüogo.

Taoba mapang ULFA(I)-i Nagaland kübok Mon district nung ONGC nung mapa inyaker nisung asemprong yutsü ta shia liasü.

Meghalaya MLA aser ketdangsürtem itasen 30% agizüksüla: HYC

Shillong, May 12, 2021 (Agencies): State sorkari COVID-19 anema raraba nung amshitsü atema Minister, MLA aser ketdangsürtem itasen nungi 30% agizüksüla ta Hynñiewtrep Youth Council (HYC)-i metetdaksüogo.

"2021-2022 küm atema MLA Scheme nungi 50% agizüksüla aser ibaji Community Quarantine Centre lapokba, ventilators, Covid Vaccines, Oxygen Cylinders aliba aser PHCs, CHCs o District Hospitals nung osettem aliba nung amshitsüla" ta HYS secretary Roy Synrem-i Deputy Chief Minister Prestone Tynsong dangi shidi zülü.

Dorbar Shnong (village councils)-i yimdaklirtem nungi

anguba sen ajanga dang maparen inyaker aser sorkar mesüra District Council nungi senotsü teyari kecha mangur. Dorbar Shnong karibo sorkari Quarantine Centre lapoktsü ashiba ama melalpoktetba khurettem lemsatepogo, ta Roy Synrem-isa ashi.

Dorbar Shnong-i khuret ajuruba atema sorkari lenmang kar bushitsüla aser pei pei telongtet nung Centre lapoktsü atema yariteptsüla, ta paisa metetdaksü.

State sorkari MLA ajak senden ka ayonga maparen inyaka aotsü atema tebilebatem lemsateptsüla, ta Roy Synrem-isa Prestone Tynsong dang ashi.

Mizoram nung nisung 400 temai sorkar yarir

Aizawl, May 12, 2021 (Agencies): Mizoram nung COVID-19 wara mapang medical nübo agi meperi timtemer saka nisung 400 den timbai sorkar den yariteptsü metetdaksüogo.

Covid-19 anema rara nung yariteptsü atema mapa manguba doctors, nurses, lab technicians aser health workers 400 temai osang agütsüogo, ta Bodbarnü health department ketdangsür kati ashi.

"Nisung aika dak Covid-19 putetba ajanga state sorkari nübo agi meperiba khuret ajurua lir. Anungji nursing institutions aser tanga medical

institutions nungi nübotem bushiteper" ta State health department joint director (Planning) Dr C. Lalzepui-i ashi.

Tang tashi nung nisung 412-i sorkar yaritsü aruogo aser parnoki tang COVID-19 dak sendakba maparen balala nung yaritepdar.

Nisung 412 rongnung trained doctors 37, nurses 144, health workers 97, lab technicians 91 aser pharmacists, dialysis technicians o helpers dena lir.

2020 küm doctors, nursing students aser tanga medical students 900 jungnüa Covid-19 anema raraba nung yaritepa liasü, ta Lalzepui-isa metetdaksü.

Biren Singh-i COVID-19 atema rongdak senden ayonga amen



Manipur Chief Minister N Biren Singh-i cabinet minister tem aser health department aser JNIMS o RIMS hospital ketdangsürtem den rongdak senden amenba noksa nung angur.

Imphal, May 12, 2021 (Agencies): Mongulbar aonung Manipur Chief Minister N Biren Singh-i cabinet minister tem aser health department aser JNIMS o RIMS hospital ketdangsürtem den rongdak senden ka menogo.

Manipur nung COVID kanga putetba atema rongdak senden ayonga amen, ta Biren Singh-i ashi.

"Senden nung shirangertem mapang shitak nung mozü kidang anioktsü, doctor tem nem teyari agütsü aser home isolation amongertem jungjunga reprangtsü indang onüktem jembi" ta paisa metetdaksü.

Manipur nung COVID-19 tensa kanga mejungi akümer aser Mongulbarnü iba tashidak ajanga nisung 20 asü.

Nisung 20 asüba züngsema Manipur nung COVID-19 ajanga tasür ajak agi 509 kümogo.

Külen, Manipur nung nisung 592 dak COVID-19 aliba putet aser parnok züngsema nisung ajak agi 4981 anepaludar.

Manipur nung COVID-19 agi shiranger nisung 4981 rongnung public 4803 aser Central Armed Paramilitary Forces nungi 178 lir.

Manipur nung tang tashi nung nisung 36370 dak COVID-19 putetogo.



Bodbarnü Meghalaya health minister AL Hek-i North Eastern Indira Gandhi Regional Institute of Health & Medical Sciences (NEIGRIHMS) semdangdang agiba noksa angur. Iba mapang NEIGRIHMS Director, P Bhattacharya-i health minister dang nübo peria maliba aser Oxygen aliba yipden talila mekümtetba indang khurettem lemsatep. (Shillong, May 12)



TIR YIMYIM YIMOBILEM (EDITORIAL)

DIMAPUR YANGTEPNÜ, MONUPII(MAY) 13, 2021

Ibai nungdak rajemba mapang

Asenok district headquarters aser sub-division shia nung government mozü ki yanglua lir saka item mozü kitem nung jagi teyari aser taneptsü mengutetyonga kecha balaka shisabolua meblem aser menememi sentsü tsüa asüyonga private mozü kitem nung dang taneptsü bushia monga aruba to, tangang, asenoki asenoksasa ashioksüba mapang ka liasüa ta rajemer. Tang ama alima tashidak wara mepoktet dangbo asenok aikati asenok asoshi yanglutsüba mozü kidang kioset aser anepalurtem shitak ali asü maliar kecha nungdaka meblem odang toktsü, iba jagi, tang kinunger junga memetetepi aliba bushiteper amai, asenok meyong mozü ki jenjang aser mozü kidang inyakertem kanga temulung agüja bushiteper. Aji oda, asenok meyong government mozü ki atema küm nung sen kwi lemzüksür aser koma endoker, kecha hau ta mali, küm aika asenoki ketdangser aser inyakertem pei sünütsü sädakja aruba to tangang asenoki sasaa bilemer. Ashiko, nübortem meyong mozü kitem atema amshitsüba senotsü shitak mamshirtemia tang ama ajak asoshi mozü ki tajung nungdakba mapang ya sasaa bilema alitsüa akok. Atangji, ajungben tashidak wara tulu arur asünungji, alima kintem shinga shitak renema aliba limabo mali saka tanga lima nung atalokba ama asen lima nung atalok nungbo tang yabo asenokbo yimkong amato samar lila ta bilemer. Asenoki senso temeten indang kanga jembir aser senso mungdang lokti sendena kanga alir, saka shitakba senso ka temeten indang jembia senso ka teinyaktsübo meinyaker. Ashi, asenoki senso ka temeten aser teinyaktsü angatet asübo, asen agitsü aser asen achitsü kisung bilema melii, yimkong asoshi bilema mozü kitem tsütsüa District Hospital, Community Health Center aser Primary Health Center shia nung kiojen, yipten, yipten sü, chiyongtsü, mozümora aser inyakertem koma, kechisa, kwi alitsüla ta mapang mapang shia mita inyaker lila. Ajisüaka, asenoki yimkong meyong rongsen yabo kibur maliba tamakitsü oset amato yutsür, iba jagi yimkong meyong mozü kidang angati taneptsü angutsüba temoatsü to magishir. Senso tajung ka tamaittsüji pei kija agitsü atema yimkong indang rongsen südena agiba ya masü saka yimkong ajungtsü asoshi pei rongsen aser nübo tenla agütsüba den nungsen arema nübortem tangutsü tim temeten indang jembitsüba mapatem asütsü. Tang ama asenok ajak tasü taküm tsungda alima tashidak wara den raraba mapang ya asenok ajak asoshi senso tetezü aser senso temeten rajemba mapang tajung ka sädaktsüsüla. Aji oda, tia mejungika, nokdang menokdangtet, asen lima nunga tashidak wara yagi tang dang nungi tamajungba tonger mozü kidang masemtsüsa shiranger adenshi nungbo koda asütsü ta shisabolua bilema, tang ano tashidak agi asenok ajak dak matongdang, asenok ajak senso tajung kaka kümmer asenok mozü kitem jenjang repringdanga renemtsübaji kanga rongdak nungdak kümogo. Joko, tangbo government-i magütsütetbatem ataa kazüdang tashidak agi menepadoktsü, anungji shitak masüba aser metokmeperi aika liaka, item ajakji nemdaka yutsür asenokia kechi akok, aji tenla agüja government mozü kiji asen kija meyong mozü ki ama bilema renemtsüba mapangji tang ya lir. Joko, yiptena talila yua atatsüla aser oxygen cylinder aser concentrator aser mozü mora ajak den ambulance gari aser inyakertem ajak shitak renema atatsüsa arogo aser lokti tentetemia shisatsü, nübo aser rongsen tenla agütsütsü tim. Tang jelia renema meyura, tashidak agi meneporbo ambulance bushiaka magutsü, inyakertem agia anungtsü, yipten agi magutsü, mozü agi matatsü aser nisung asüba remer merematsü. Ibai pei kija agitsü aser pei kija kümzüksü bilema inyakba mapang masü, iba tamashi mapang to süiogo, joko yimkong kümzükra nia kümzüksü ta bilema, yimkong ajungtsü atema bilema inyakba mapang ka agi asenok menepogo. Iba rongdak nungdakji rajema tulu tila na prongla senso tajung kaka kümmer sensosanger taküm kümzüksü asoshi kechi ochi aser kechi shitak, item indangji bilemdanga inyaktsüba mapangji tang ya lir. Sensosanger kümzüktetra nia kümzükogo ta asenok ajaki bilema iba tongpang nung senso shitakba küma shilem agidi.

OLEMSABANG

COVID 19 DAK SENTAKBA TENANGZUKBA 15, NUBURTEMI ANITAKA INYAKTSÜ ASER BENSITSÜ YIMYATEM

- Department of Health & Family Welfare, Mokochung : Nagaland.

1. Tangar dak mekongshi-i salem shiang.
 - * COVID1-19 tashidak prokshia aoba nungi kumzuka alitsü atema tangar dak mekongshi inyaksangshitsüla.
 2. Tangar ka nungi süklep 6 mesüra meter 2 pila liang.
 - * Nebur aliba tesem nung, shishilemba dak, mozü ki nung aser office nung tangar ka nungi süklep 6 mesura meter 2 pila liang.
 - * Anasa aliba nisung ka COVID-19 agi tonga lira na-a menatsü lendong tulu lir.
 3. Tanaben amshitetba mask mapang ajak nung teni tepang kubanga inokang.
 - * Pei sasa yanglutetba mask inokba ajanga tashidak wara nungi kija aser lokti ajak kumzüka alitsü.
 - * **Kechi mapang nung sa mask amshitsü:**
 1. Ainlen jajadang aser nübur aliba jaka nung.
 2. Takdang ka nung külemi tangar den alidang.
 3. Na kodang aketa, temang meta-a lidir.
 - * Mask tejak nung mekalokdang tamasa teka kanga junga sapoon mesüra alcohol adenba hand sanitizer amshia shidokang.
 4. Tenük, tepang aser teni nung tekongshi.
 - * Mesen keta aliba osettem teka agi aiben shia arua amshir aser memeteti teni tepang nung kongshir, mesen tem temang tulungi ayir aser na shirangdaksütsü.
 - * Na kumzüka alitsüji nü teka nung lir.
 5. Tangu sashiba yimya junga benshiang
 - * Na aketba mapang aser sachidang romal mesüra tissue paper amshia tebang nembangang.
 - * Romal aser tissue paper melira nü teka koleber sachiang aser aketang.
 6. Mapang aben sapoon aser tzü agi teka metsükang.
 - * Sapoon aser tzü melira alcohol aketba hand sanitizer amshiang.
 7. Sali-moko machitsüla aser nubur aliba tesem nung metsü temetsü.
 - * Lokti aliba tesem nung metsü metsüba ajanga COVID-19 mesen tali prokshir.
 - * Lokti aliba tesem nung metsü metsübaji ozüng ajanga temerenshi lir.
 8. Teti amshiba osettem mapang aben merüktetsüla.
 - * Na aliba jaka mesüra tesüm teti merüka yuang.
 - * Teka nung gloves inoker mozü amshia osettsüset aser temüket teti shidokang.
 9. Nungdak tulu melira ainlen tesenzü.
 - * Mepaidoktetba nungdak ka mesüra akokba tashi agi senzü senbong tesü. Senzüsü sa kumra, kumdanga azüoka senzüang.
 10. Nisung Shianga bensatsüsa tesü.
 - * COVID-19 tashidak agi tonga aliba kinungertem dang temiem sayutsüla aser nungetsüla.
 - * Yakbang sa inyaker tem: Doctors, Nurses, Police, Sanitation workers shirnok belema inyaker parnok dang akumtsübo, temeim sayuang aser parnok maneni ajongshiang.
 11. Lokti madenshitsu asoshi merangang, aser pei sasa iba tashidak nungi kumzüka alitsü ajongshiang.
 - * Takok tashi lokti tulu kechia a maotsüla.
 - * Metitemtetba sendongtem lira akok tashi nisung tajemba asütsüla aser tetsungda ayutsüla.
 12. Osang junga mejangjai social media sabang nung osangtsüsang teprokshi.
 13. Osang tejangja metetpelatsü asoshi COVID-19 kedangsür den Tongtepratepang.
 - * Osang tejangja metetsü atema Ministry of Health and Family Welfare's website (www.mohfw.com) nung repringang.
 14. Teyari nungdakra national toll free 1075 nung tongtepratepang.
 - * Na temang meta-a, aketa mesüra tango sashiba teimtem lira, nungnanga meli tekaraba nung tongtepratepang.
 15. Shisabolua ratamatara Psychosocial teyari agiang.
 - * Teyari nungdakra, National Psychosocial toll free helpline number 08046110007 nung tongtepratepang.
- Item yimyatem ajak dak alaka tongitipangtibaji COVID-19 vaccine agitsü nungdaker. Mokochung District nunga COVID-19 vaccine küm 45 tema pur nem agutsüdar.
- Küm 18-44 tetsungda pur ajak COVID-19 vaccine agitsü atema COWIN portal, website- selfregistration.cowin.gov.in nung register sua atatsüla.
- Sorkar nungi kodang mozü arudir idangji küm 18-44 nem vaccine agutsü tenzüksü.

TEMETETSÜ KAR:

- Nisung shirnoksa cancer, hypertension, diabetes, temulungjang tashidak, kidney transplant lir nungdakba mozu tem ita ana(2) mesura asem(3) atemabo sa alia ayutsüla.
- Temang nung timtem tulu melira mozuki bushia moi kidang anepalu tajungba.
- Akok tashi mozu ki aser kidang shiranga alir semdangi maotsüla.

TELONGJEM NUNG ASENOKI COVID-19 DEN RARATI.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Pakistan nung Ireland nunger missionary ka Covid agi süogo



May 10, 2021 nü Rawalpindi (Pakistan) nung aliba St. Joseph Arogo nung Mill Hill Missionary (MHM), Thomas Bernard Rafferty asüpila sentong agidang tangokba noksa nung angur.

May 12, 2021: Pakistan linük nung Taliban kiralongrartemi kanga timtem agütsüba mapang nunga Khristantem tenzüka aruba Ireland nunger missionary ka coronavirus tashidak agi süogo.

Mill Hill Missionary (MHM) nungi putir, arrshi küm 75, Thomas Bernard Rafferty May 9, 2021 nü Nowshera, Khyber Pakhtunkhwa province nung coronavirus tashidak agi süogo.

May 10 nü Rawalpindi nung aliba St. Joseph Arogo nung agiba pa den asüpila sentong nungji putir 20 dak tema aden aser May 11 nü Nowshera cantonment nung aliba Holy Name Arogo nung pa nungtem nung tekülem sentong agia liasü.

1987 küm Islamabad-Rawalpindi Arogo nungi Simeon Pereira-i Himalaya len, talisa Swat valley aser Karakoram tenemlen mission mapa

tenzüksü atema Rafferty nem temelaba agüja liasü.

Islamabad-Rawalpindi Arogo nung Commission for Social Communications Director, Naser William-i, "North tsütsü kanga tezülen aliba tesemtem nung shingaia Khristantem mesemdangner, ta pai (Rafferty) angateta liasü. Putirtemi yimitem aser takar Arogotem nung ang tenzüksü janngar," ta ashi.

"Pai Arogo nung tenzüksü melen nisung ajaki sendoka yutsüba Khristantem ang tenzüksü janngara liasü. Pai tetsüng agi ghonda 30 shi tashia jajaogo. Pai Arogo nung züngsemtem missionary inyaktsü atema janngadaksü. 1988 küm pai Missionaries of Saint Thomas Apostle sisters tenteta liasü," ta William-isa metetdaksü.

1973 küm tzümetsüng lendong ka atalokba sülen pai

Indonesia nung kiralongrartemi aluyimer Khristan pezü tepset

May 12, 2021: May 11, 2021 nü Indonesia nung Central Sulawesi province kübok Poso district nung East Indonesia Mujahideen kiralongrar teloki aluyimer Khristan pezü tepsetogo; Mongolbar anepdang 8:25 ako nung Kalimago yimdak coffee lu ka nung Khristantemji mapa inyaka aliba mapang nung kiralongrartemi tepset.

Central Sulawesi police otongdar, Didik Supranoto-i ashiba agi, kiralongrar pongu noklangnok amer alu jagi arua Khristantem amakba mapang nung aluyimer kabo jena oteba sülen pai iba osangji yimdaklirtem aser police nem metetdaksü.

Supranoto-isa, "Aibelenertemji East Indonesia Mujahideen telok nungi züngsemtem lir, kechiyong aluyimertemi parnok rongnung kabo, Qatar lir ta jangjaogo," ta metetdaksü.

Task force team, police aser sepaitemi kiralongrartem sashia mita aoba agi parnoki yangji alirtem tepseter, ta paisa ashi. Osangbener den jembidang

University of Indonesia nung Intelligence Analyst, Stanislaus Riyanta-i, East Indonesia Mujahideen nung züngsem ter lir aser iba teloki Islamic State den tesendaktep yangluba sülen police-i East Indonesia Mujahideen nung tongti lenir, Ali Kalora tang tebushidak, ta metetdaksü.

Yaküm November ita nunga East Indonesia Mujahideen kiralongrartemi kasa province nung Sigi kübok Lembantongoa yimdak Tenla ki ka rongoktsü aser Khristan pezü tepseta liasü.

Iba telok ya 2012 küm tentet asütsüa akok ta bilemer. Indonesia nungsa Jamaah Ansharut Daulah kiralongrar telokbo linük tesem ajungalen prokshia lir aser parnoki talisa Central Sulawesi province nung timtem agütsür.

Jamaah Ansharut Daulah telok ya Islamic State aser Abu Sayyaf naprongla den tesendaktep lir.

Iba telok nung mezüng lenir, Santoso bo 2016 küm tepset aser kasa telok nungisa lenir, Muhammad Basri pua liasü.

Josephabad nung kibong 118 atema ki sütsü aser yimer nem tractor ka agüja liasü.

1970 küm June ita nung St. Patrick Church, Donaghmore, County Meath, Ireland nung pa 'ordain' asü aser kasa küm nungjisa November ita nung pai Punjab Province kübok Gujarat yimti nung MHMs den senteper ministry tenzüka liasü.

1979 küm pai Afghan refugee tem yari aser 2010 küm pai St. Joseph Colony tenteta tzümetsüng lendong nugi kümzükertem nem angati ki agütsü.

Arogo nung tongti putir, Arshad-i, "Ozü Arogo repranger MHMs den ni mangyim jashi lemsateper. Pa asüba ya ajak atema takoksa tulu. Tangbo linük nung Mill Hill Missionary pezü dang anüngogo," ta metetdaksü.

ANOGO ABEN TSÜNGREM DEN

O Bendangba Halleluya

Ibai Jungkai Adok 19:1-2 nung angur. "Halleluya! Tekümtet aser sentsüwangshi, aser ain asen Tsüngrem meyong, kechiyong pa O bendangba ochi aser temeshi, kechiaser koba nüktapangtala pei nüktapangta mapa agi alima menentsü, Pai la O bendang aser nüktapangtala teka agi Tsüngrem tenzükertem azü mang yangogo. Aser tanaben parnoki ashi, Halleluya! Aser la mokozü teti tatem makai atur. Shirnoki tangar jakla aser tepela raksatsür parnok dang ochi obendang agütsübaji Halleluya ta agizükbaji yimya tamaren lir.

Nüji Tia Yimsüsüba Halleluya

Halleluya! Kechiaser ajak Takoksang asen Tsüngremi chubar. Tsüngrem Chuba menden nungi atsüngtoker amai, saka Pa matsüngtoker. Pai nisung aibelen yari memerenshii taochi sayur. Temenen nisung Khrista azü ajanga melenshitsür, "Halleluya, Halleluya, Halleluya kechiaser ajak Metetsang Tsüngremi yimsü asür."



OFFICE OF THE DIMAPUR AO BAPTISTAROGO

DIMAPUR - 797112, NAGALAND

DABA OFFICE AJANGA SANGDONGER

Temeim arogopurtem, nenok ajak dangi asen Kümtetdakba Yisu Khrista temeim salem, DABA Office nung tenzükertem ajaki bener arutsür, aser tanü tashi asen arogo tetuyuba inyakyim balala ajak nung, temulung agüja aser tashi angaa anidakba asoshi maneni pelaba lemsateper.

Covid 19 tashitak kanga prokshia akümer asünung, amangbapurtem kümdanga kümzüka ayutsü meji asen arogo telemtetba kar lemsateper.

I. Mapang tatsüka Tekülem Sentep pei kidang agitsü asoshi tang ama online nung YouTube ajanga yoktsü. Kibong Tekülem nung atentsü asoshi ken number agütsür.

Anogo	Tetenzük ken	Tenla Mapang	Tatem ken
15th May 2021 (Sat)	33		41
16th May 2021 (Sun)	36	36	200
19th May 2021 (Wed)	43		50
22nd May 2021 (Sat)	45		53
23rd May 2021 (Sun)	48	48	56
26th May 2021 (Wed)	63		61
29th May 2021 (Sat)	120		122
30th May 2021 (Sun)	60	60	57

II. Asenok ajaki maneni sarasadema arudagi ano 15th May 2021 honibar anepdang, arogopur ajaki pei kidang ghonta ka 5:00 am - 6:00 am sarasademtsü ayungzüker. Sarasadem guide asütsü asoshi onük kar agütsür, ano bendenloka agiangma.

Sarasadem Onük

- Covid-19 wara agi senti taküm jenti süogo, nüktü nung temulung raksa-a alirtem asoshi sarasademtsüdi.
- Covid 19 tashitak agi shirangertem nem teimla aser taneptsü agüjang ta sarasademdi.
- Tanü tensa wara tulu mazüokteti aoba anogo ka nung mozü shiteter, doctors, Medical scientist aser mozü kidang inyakertem ajak nem Tsüngrem tekümüzkba aser shisatsü agüja inyaktettsü tashi agüjang ta sarasademdi.
- Tang tensa nung Front Line workertem shirnoksa kanga anibelega inyakdagi parnok ajak tashitak wara nungi kümzüka yujang aser nüburtem asoshi inyaktettsü tashi aser shisatsü agüja ajungketa amshiang ta sarasademdi.
- Iba wara koktettsü asoshi alima lenirtem nem Tsüngremi tangatetba shisatsü tajung agüjang ta sarasademdi.
- Nüburtemi iba wara den raraba nung pei shilem shitak angateta inyaktettsü aser kümdanga alitsü yariang ta sarasademdi.
- Covid-19 tashitak prokshia aoba ya Tsüngrem tashi tulu agi nokdangang ta sarasademdi.
- Asen chirtem aser adianutem bendang lima oa azünger aser mapa inyakertem ajak, ano alima balala nung Mungdang aser Arogotemi sponsor süa yoka aliba Missionarytem Tsüngrem tashi agi Wara tesashi nungi kümzükanng ta sarasademdi.
- Iba Covid 19 tashitak ya Tsüngremi kija aser kintem Pa metetba dangi ajaba ola ka südakjang ta sarasademdi.
- Iba wara ajanga Khrista dak amangbapurtem pei taküm aser kibong tia bushiteta Khrista dak tamang tuluba küma saksalema kümdaktsüba mapang ka südakjang ta sarasademdi.
- Tsüngremi iba tashitak wara nungi asenok ajak kümzüka yujang ta sarasademdi.
- Mapang talangka melie aki ama tenlakitem nung lokti sentepa Tsüngrem tenüng sanga külemtettsü tensa bener arujang ta sarasademdi.

Alima tensa majungba ajanga asenok lokti sentepa tekülem magiteter. Ya tekülem athir masü, saka tekülem pei kibongi bener arutsür. Anungji ibai mapang tajung ta bilema ajaki tenoktenoka shilem tajung agitsü mepishir, iba nung Tsüngremi ner kibong kanga moatsütsü.

Asen arogo Fellowship ajak nung Tenlaki azünga meyutsüi, amangbapurtemi pei pei mapang nung oa sarasadema Tsüngrem den mapang agitsü ayungzüker.

Sarasadem nung kanga tashi ita alitsü merangdi, kechiaser asen sarasadem ajanga Tsüngremi asenok kümzüksü. Ano iba den asen teinyaktsütem kechisa lir ajakji kanga shisa kaa inyakba ajanga kümdanga alitsü merangdi, aseni merangba nung Tsüngremi asenok yaritsü.

Tematiba asen Tsüngremi arogopurtem ajak kümzüka yujangma.

Rev. I. Wati
Rev. I. Wati
Pastor

Dimapur Ao Baptist Arogo



OLONG PAITEP # 5810

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

- | | | | |
|---|--|--------------------------------------|--|
| TIPILEN | | LANGTSÜNGLEN | |
| 2. Teburtemi tejak nung awaba - (8) | | 1. Temejangdak - (6) | |
| 6. T _ _ _ em - (3) | | 3. Nisung ka mapa inyaksü nübo - (4) | |
| 8. Tzük ayudak - (3) | | 4. Azüntsü asoshi mejemba - (6) | |
| 9. Nüngdakba dang timba - (6) | | 5. Tesangwa agütsüba - (5) | |
| 11. Züina ao - (4) | | 7. Tila masü - (4) | |
| 12. Yangi tzü angur - (5) | | 10. Tebenjem tetsür chanu - (4) | |
| 14. Tangar dang nungi tali - (4) | | 11. Tekolak nung inok - (4) | |
| 16. Senyong masü - (6) | | 12. Tetsüngda - (6) | |
| 17. Oadokdi - (3) | | 13. Tangar inyakba ka inyak - (6) | |
| 18. Tzü tarok - (3) | | 14. Tim masü ta ashi - (5) | |
| 19. Yimtaklir aikati iba ya ki den külemi yanglusemer - (8) | | 15. Asalendong - (4) | |
| | | 16. Tanü dangtsü - (4) | |

OLONG PAITEP # 5809 TELANGZÜBA

- | | |
|---------------------------------------|--------------------------------------|
| TIPILEN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. Teronem, |
| 14. Ola, 16. Talak, 17. Mazük. | 12. Sempa, 13. Jahaz. |

ANÜNG O ALI NA MEYIPEPOGO

Alokba : Ohoi...Adianu alima to chiji-mashi meyiptepogo...anung o ali na meyiptepogo...

Sobangba : Waaa...!!! Odi kodaser chiji-mashi meyiptepsü.... anung o ali na meyiptepsü ??? Na-a ajibo yimso-yimlir... tashi-tawar memesuk tamamangtsü o ka jembir ado.

Alokba : Ayyyaaa... adianu akhidangbo kimong-lumong makartemi alu tilaka danga achitsü mechi nung...ayongsepi orr ango pongsen...ak chanu shi pongsen...an tepong tulu bentsür yimkü - yimlir kimong-lumong akar dangi aputaka mepeshia ao.... Saka tanü putu nung ner lanur aluyimer mali...aji agi meyiper kimong-lumong akartemi tayim-tanar dangi shi-ango bener oa...oda imlibilema takümbo ozü lu tilaka danga yimang...ta mepeshitsüsa kümogo nii...Kechiba sura arr-ayanga amaa-adoktsüsa kuma aor...ashiko putu ishika sulenbo tsüraburi alu lumang mongsong aika alidena toktsü yongjia chirnur/semchisemnurtemi memetet/mejangja kibur mali akümtsüa kecha meteta maka...!!! Anung o ali na meyiptepogo ta asübaji aji adi.

Sobangba : Ayyyaaa...Odi oda nasa tabensabaji...ni tangjiang jungjunga angajemogo nii...!!!

Lilir : L.Kika Pongener.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Ilong

(v) kara, yakta, aritepa (hurry)

* Onok menutsü asüba agi **ilonga** ao.

Imla

(v) langka angutsü mesüra ataloktsü ta bilemba (hope)

* Asanglai kanga junga takok angutsü ta ajaki **imla**.

Happy Birthday

TENÜNG : IMTIMEN

Tasoba : 13 May 2015

Küm : 6

Class : KG A

School : Green Hills Academy

Talidak : Chuchuyimlang

Jabaso Amen taküm tajung toktsüba asoshi Tsüngrem tenüng asanger. Tsüngrem tsübuba jabaso asütsü onoki na atema sarasademtsür.



- Temeim Oja, Oba, Oya, aser Kinungertem

TANÜBO NAI LANGZÜANG

Q. Sinopharm vaccine koba country-i yangluba WHO-i agizüka lir ?

- a. China b. Russia c. India d. Israel

(Taruba adok nung onoki langzüksü)

YASHI ADOK TELANGZÜBA : British

SUDOKU # 5853

TELANGZUBA # 5852

8	2	5						6	4	5	6	9	2	3	8	1	7
			9		3	2	7	8	8	9	2	7	6	1	3	4	5
			8	2	6	1	5		3	1	7	4	8	5	2	9	6
			2	6					9	3	5	1	7	2	6	8	4
	8	9	5	1		4	2		7	4	8	5	9	6	1	2	3
7		2			4		6	5	6	2	1	3	4	8	7	5	9
	5		4			6			5	6	3	8	1	4	9	7	2
2		6			8	5	3	7	2	8	9	6	5	7	4	3	1
				3	5		4	2	1	7	4	2	3	9	5	6	8

OJANG LUTEP # 5396

- ETGATANTBA :
- KAMEI :
- NZÜKTEBAJI :
- ÜNANG :
- MTO :
- UNNG :
- IK :
- ANGYLU :
- NDE :
- ASKA :

OJANG LUTEP TELANGZÜBA # 5395

PEI MEKÜMDANG YUR TANGAR DANG KÜMDANGSHIA ALITSÜ OSANG SANGOKTSÜBAJI AMAJOK

TAN HOPTA ATEMA - KOMA SÜLA ?

Q. Asen lima nung Covid-19 agi shirangertem anepalutsü pur doctor aser nursetem agi meperi aküm nunga koma süla ?



May 12, 2021 nü Thane nung aliba Thane Nurses Training Vaccination Center nung sensotem covid vaccine agitsü atema nokdaka aliba noksa nung angur.

India nung tang mezüing Coronavirus agi shiranger timtiba süogo

New Delhi, May 12 (Agencies): Yaküm India nung coronavirus wara prok tenzükba mapang nungi tenzükba tang tashi nung anogo ka kija nung coronavirus agi nisung timtiba asüba anogoji Bodhbar liasü; tesüiba ghonda 24 tsüingda India nung coronavirus tashidak agi nisung 4,205 asü.

India nung ano coronavirus tashidak agi nisung 4,205 asüba sülen tang tashi nung iba tashidak agi asür ajak agibo 2,54,197 jungogo, ta Bodhbar nep 8:00 ako nung Union health ministry indang website ajanga metetdaksü.

May 07, 2021 nüa linük nung coronavirus tashidak agi nisung 4,187 süa liasü. Tesüiba anogo

14 tsüingda linük nung coronavirus tashidak agi nisung 50,000 jungnüa süogo, aser ibaji anogo shia nisung 3,528 den kasa lir.

Tesüiba ghonda 24 nungsa India nung ano nisung 3,48,421 dak coronavirus putetogo aser linük nung coronavirus caseload ajak agibo 2,33,40,938 jungogo.

Tang linük nung coronavirus agi teshirangdakpur 37,04,099 lir aser ibaji coronavirus caseload nungi shilem 15.87 lir. Linük nung iba tashidak agi shiranger 1,93,82,642 anepogo aser iba tashidak agi shiranger asüba shilem 1.09 lir.

Osang tajung kaji- UTs aser states 18 nungbo anogo shia coronavirus tashidak tajemba-

tajemba putetdar, aser item states rongnung Maharashtra, Uttar Pradesh, Delhi, Rajasthan, Chhattisgarh, Bihar, Gujarat, Madhya Pradesh aser Telangana densema lir.

Bodhbarnü ICMR-i, May 11 tashi nung samples 30,75,83,991 tendangogo aser iba nungji Mongolbarnü samples 19,83,804 tendangba densema lir, ta metetdaksü.

Alima nung tang tashi nung nisung million 159.3 dak coronavirus putetogo aser iba tashidak agi nisung million 3.31 dak tema süogo.

Iba tashidak agi tamajungba kongshiba linükji United States (32,773,387) lir aser tanabuba linükji India (2,33,40,938) lir.

UP kübok Ballia nung aliba Ganga ayong nung ano tasü mang 7 angu

Ballia, May 12 (Agencies): Uttar Pradesh district kübok aliba Ganga ayong nung Bodhbarnü tasü mang tenet tzü nung apong daka angu; tang tashi nung iba district nung aliba Ganga ayong nung tasü mang ajak agi 52 nguogo, ta ketdangsertem osang ka ajanga metetdaksü.

Asürtemji coronavirus tashidak agi asü asütsüa akok, ta bilema district administration-i kanga ilonga tasü mangtemji rongdok. Ballia district nung alirtemi ashiba agi, May 11 nikongdanga Narahi area kübok Ganga ayong nung tasü mang 45

tashi nguteta liasü.

Mongolbarnü (May 11) District Magistrate, Aditi Singh-i sangdong ka ajanga, Ballia-Buxar apu anasa tasü mangtemji aika shizüka oor angu, ta metetdaksü.

Laisa, Sub-Divisional Magistrate (Sadar), Rajesh Yadav aser Circle Officer, Jagveer Singh Chauhan nati iba tatalokba bushisü ngdangdar aser administration-i asürtem nem akhüm agüja tasü mangtem rongdokogo, ta metetdaksü.

"Mongolbarnüsa asüpila sentong agia tasü mangtemji rongdok. Tasü mangtemji kong

nungi ponger aluar onoki jangjatsü merangdar. Ayong nung tzü ayimba apibo tasü mangtemji Buxar aser Bihar tesem balala nungi ponger alu asütsüa akok," ta Bodhbarnü Yadav-i metetdaksü.

Buxar ya Ballia tsü nglanglen ang lir, ajisüa ka tasü mangtemji Buxar nungi asütsüa akok, ta paisa osangbenertem nem metetdaksü.

"Ballia kübok Bharauli aser Ujiyar ghats, aser Buxar kübok ayongküm na tsü ngda kilometer 1 dang lir, ajisüa ka ayong nung mopungji Ballia leni aoner," ta Yadav-isa metetdaksü.



May 12, 2021 nü Bengaluru yimti tezülen moapu ka nung coronavirus tashidak agi asürtem tasü mang rongdokba noksa nung angur.

Linük 44 tashi nung India nung Covid-19 variant putetogo: WHO

Geneva/New Delhi, May 12 (Agencies): Bodhbarnü World Health Organization (WHO)-i, India linük nung coronavirus wara tali prokdaksüba Coronavirus variant ka linük 44 tashi nung putetogo, ta metetdaksü.

UN health agency WHO-i, Covid-19 variant- B.1.617 ya mezüing October ita nung India nung puteta liasü, aser WHO indang region trok kübok linük 44 nunga samples 4,500 nung iba variant ya putetogo, ta metetdaksü.

India medeni bendanglenbo iba variant ya Britain nung timba putet.

Tan hopta tetenzüklen WHO-i B.1.617 ya Covid variant rongnung zü ngsemogo.

Tamalan Covid variant asemji Britain, Brazil aser South Africa linüktem nung tama puteta liasü.

Item variants ya tamajungba, kechiyong original coronavirus dang nungi item ya temelaba

menar, nisung melamela asür, mesüra vaccine karibo mapa meinyaker, ta WHO-i metetdaksü.

Bodhbarnü WHO-i, B.1.617 ya variant rongnung zü ngsemogo, kechiyong original virus dang nungibo iba ya temelaba menar aser linük aika nunga puteter, ta metetdaksü.

WHO-i ashiba agi, mezüing bushisü ngdang ajangabo, iba variant ya monoclonal antibody Bamlanivimab treatment agia mapa junga meinyaker ta kuli nguogo.

Alima nung coronavirus tashidak timtiba putetba linükji US lir, iba sülen tanabuba jenjang nung nütsü ng billion 1.3 aliba linük (India) lir.

"India linük nung Covid-19 ano tanaben sashia prokba ya kuli aika ajanga lir, aser item kuli rongnung SARS-CoV-2 variant balala putetba aser mela-mela prokba ajanga lir, ta WHO-i kuli nguogo," ta WHO-isa metetdaksü.



Bikaner (Rajasthan), May 12, 2021: Bodhbarnü International Nurses Day anogomong nung Bikaner nung aliba Covid hospital ka nung nurse ana teketsü agi salemba noksa nung angur.

Petrol jenjang maneni atur; Bhopal nunga litre nung sen 100 kümogo

New Delhi, Monupii/May 12 (Agencies): India linük nung Petrol aser diesel jenjang maneni tudar aser Bodhbarnüa gari totzü jenjang maneni atuba ajanga Bhopal nung tang mezüing petrol litre ka nung sen 100 jungogo.

Linük yimtiba, Delhi nung petrol litre ka nung poisa 25 aser diesel nunga poisa 25 atu.

Tan ita kija nunga tanü agi tenetbenbuba gari totzü jenjang tuogo; taoba hopta nunga anogo pezünü tashi totzü jenjang tua liasü.

Tan ita kija nunga New Delhi nung petrol litre ka nung sen 1.65 aser diesel litre ka nung sen 1.88 tuogo. Taküm January-February mapang totzü jenjang kanga tua liasü aser March 24-25,30 anogotem nung jenjang alu. Iba sülen oil companies-i anogo 15 tashi jenjang atu aser April 15 nü jenjang ajema liasü. Iba sülenjibo state pezü aser UT ka nung assembly election agiba mapang anogo 18 tashi totzü jenjang memelenshii liasü. May 2 nü votes zü ng election

osang sangdongba sülen May 4 nungibo totzü jenjang atur.

Tang Delhi nung petrol litre ka nung sen 92.05 aser diesel litre ka nung sen 82.61 agi ayoker. Linük nung rongsenkettsü ng yimtiba, Mumbai nung petrol litre nung sen 98.36 aser diesel litre nung sen 89.75 agi ayoker.

Bodhbarnü tang mezüing state ka yimtiba nung petrol litre ka nung sen 100 ajungba yimti Madhya Pradesh yimtiba, Bhopal lir. Tang Bhopal nung petrol litre nung sen 100.08 aser diesel litre ka nung sen 90.95 jungogo.

Taküm February ita nung Rajasthan aser Madhya Pradesh na nung aliba yimti ana nung petrol litre nung sen 100 ajung.

Tang Madhya Pradesh kübok Anuppur nung petrol litre nung sen 102.66 aser diesel litre nung sen 93.33 jungogo. Maharashtra nunga tang mezüing Parbhani district nung petrol litre nung sen 100 jungogo.



Cali, Colombia nung sorkar anema longkak aitba mapang kaketshirtemi "Who killed them" ta nungja agüja aliba jilushi ka aiba noksa nung angur. Colombia nungertemi linük tesem ajungalen sorkar anema longkak aiter. Sorkari parnok nungdakba mapang talangka senzuka yutsü, ochimashi mapa inyaker nem yimsü sūdaksü aser coronavirus mapang saru tali temloksü meranger, ta nūburtemi ashir.

Taliban teloki Afghanistan nung district ka agi

Kabul, Monupii/May 12 (Agencies): Asemnü ceasefire tenzüksü anogo ka lia, Taliban-i Afghanistan yimtiba, Kabul anasa district ka amokbang.

Telungpurtemia Wardak province kübok Nerkh district ya ajungbena amakba mapang agiogo, ta Mongulbarnü metetdaksü.

Hopta ka tsüngta Taliban küboki district ana tashi aitogo.

September 11 tashinung US aser NATO sepaitem anizüker omatsü renemba mapang Afghanistan nung azüdokshi taliba akumer.

"Maidan Wardak province nung Nerkh indang district centre, yangji aliba police headquarters, intelligence

department aser mitkartem amenokba tesem tuluka atsüngdokogo," ta Taliban odongtar Zabihullah Mujahid-i Twitter nung ashi.

Yangji tsükchir meyong sepai aika tepsetogo mesüra yiruogo, ta pai ashi.

Iba province indang governor Abdul Rahman Tariq-ia district ya agiogo aser Afghan sepaitem district nungi meyipa ogo, ta ashi.

Iba district meyipa agitsü atema rara tenzüksü, ta defence ministry ajanga Bodhbarnü ashi.

May 5 nü telungpur temi northern Baghlan province kübok Borka district agiba sülen Nerkh district ya agir.

Muslim nunger Eid benjong den atongsema

asemnü ceasefire ya Brehostibarnü nungi tenzüksü lir.

Taliban teloki Afghan sorkar dak tan ita nungi tesashiba timtem agüja arur.

Kabul nung school ka kima anogo ishika tejakdang kaketshir timba sür nisung 68 pokseta liasü. Iba lendong nung nisung 165 yirua liasü. Afghan sorkari iba lendong ya Taliban telungpur dak tai tongloksü saka parnoki shilem agia mali, ta ashi.

US nung 9/11 lendong agütsüba sülen al-Qaeda ya Taliban alidak anenzüka ali aser Afghanistan nung tang tashi Taliban ten kanga junga sendaktepa lir, ta United Nations ketdangsür kati taoba küm shia liasü.

Arrotsü anasa Russian sepai 100,000 lir: Ukraine

Kyiv, Monupii/May 12 (Agencies): Ukraine den tensa mejungi akumba mapang Moscow-i taoba ita mitkartem anizüker aotsü sangdongaka, par linük antiolen tsütsü Ukraine den arrotsü anasa aser pari tashiyim agi amokbanga aliba Crimea nung sepa 100,000 shi yua lir, ta Ukraine indang state security service tekolakbai ashi.

Arrotsülen nungi mitkar indang hadir aser sepaitem ajakbo bener mainshi lir, ta Ukraine Tir Volodymyr Zelenskyy-i Hombarnü Russia aitsüba sülen Ivan Bakanov-ia Mongulbarnü iba olen benoka liasü.

Ukraine anüdoklen rara agi sünger aliba Donetsk aser Luhansk region nung rara tanemi tesashiba akumba ajanga Russia indang mitkartem yangji amenok, kong 2014 küm April ita sorkar anemertemi alinük tuluka rakzükba sülen Russia-i busemba separatist sepaitemi sorkar meyong sepaitem den rara liasü.

Moscow indang sentong nung shilem ka ama Russian military unit temi Black Sea region nung aliba Crimea nung exercise agia liasü, koba Kyiv ket nungi 2014 küm March ita rakzüka liasü.

Russia-i yimjak nung arrotsüleni sepaitem yokba indang sangdonga mali, saka yangji sepai 100,000 dak tema yoka lir, ta European Union indang top diplomat, Josep Borrell-i April ita tiyong nung shia liasü.

NATO aser transatlantic security alliance nung lenir züngsem, United States ajanga ashiba agi, Crimea amakba mapang renemshiba sülenbo Russia sepaitem tang timba adenshia lir.

Saka Moscow-ibo NATO aser Ukraine ajanga training

exercise agitsü atema jaokba nung shilem ka amai sepaitem ya yangji amenoka lir, ta tebu kuma ashi.

Ita ishika tebilemsü khuret agi müketbanger lia aruba sülen April 23 nungi tenzüka sepai kar arrotsülen nungi anizüker aotsü totuyuba agütsü.

Saka iba mepetmesü ajanga Russia o Kyiv aser par anüolen tembar linüktem tsüngta tesendaktem kanga mejungi akum, koba Moscow-i tepuokdak yua alisang Kremlin anemer Alexei Navalny mejungi amshiba ajanga tesendaktep ya mejungi kumer liasü.

Ukraine arrotsü anasa Russia-i tashiyim amshia mitkartem anidener, ta aitsüba sülen Washington-i Ukraine atema security tsütsü teyari agütsüba timba kumdaktsütsü akok, ta US Secretary of State Antony Blinken-i taoba hopta shia liasü.

Blinken-i Kyiv semdangba mapang, Russia-i arrotsülen nungi sepaitem anizüker aotsü ta sangdongaka yangji sepai aser hadir aika yua lir, ta shia liasü.

US Tir Joe Biden-i Ukraine semdanga Zelenskyy den ajuruteptsü janrara, ta Blinken-i ashi saka iba dak alia osang tejangja mashi aser NATO nung Ukraine adentsü tejangraba aliba atema Washington tebilemba indang mashi.

Crimean Peninsula nung sepai meyirijang ter dak tema yoka aliba nungi Russia-i sepai 3,500 shi dang anizüker ogo, ta Zelenskyy-i shia liasü.

Russia-i Crimea atsüngdokba aser Ukraine anüdoklen raraba sülen Kyiv busemer tashi tulutibaji Washington ya lir. Küm tenet raraba nung nisung 14,000 tepsetogo, ta Kyiv-i ashir.

Israel tayimtsü amshia amakdak nisung asür 43 jungogo

Gaza City, Monupii/May 12 (Agencies): Israel-i Gaza nung tayimtsü amshia amakdak asür nisung 43 jungogo aser item rongnung tanur 13 aser tetsür asem dena lir, ta Gaza Health Ministry ajanga ashi.

Palestine nungeri Israel tsütsü rocket khaloktsüba sülen Hombarnü nungi tenzüka tayimtsü amshia amakdang Palestine nunger nisung 300 jungnüa yirur lir, ta ashir.

2014 küm Gaza war sülen iba tesem nung tang rara tamajungtiba adoka aliba ya tawa Jerusalem nung Palestine nunger longkak aiter aser Israel police tem tsüngta Al-Aqsa Mosque compound nung raratepa ajanga janrudaktsü. Al-Aqsa Mosque ya Yihuda nunger aser Muslim nunger atema temeshi tesem ka lir.

Bodhbarnep Gaza nungi rocket jenti khaloktsü aser Israel-i tayimtsü amshia maka 2014 küm sülen azüdokshi tamajungtiba ataloka tatem kati

arutsü nükla mangur.

Gaza nung Hamas yimsüsür aser danga sepai telok balalai rocket noklang aika khalokja khenbo Israel indang missile defense agi mayimjemi akum aser iba yongji tayimtsü amshia amakba aser ola tulu adokba olatem Tel Aviv aser danga yimtitem nungi angashi. Tel Aviv ya Israel indang yimti tulutuba lir.

Israel-i tayimtsü amshia amakba ajanga Gaza Strip nung apartment tower ana aoyi kimtsü, kong 2007 küm Hamas-i yimsü asü tenzükba sülen Israel aser Egypt nunger tenokdangba kübok Palestine nunger million ana shi lia arur. Jenlia tekumdangtsü khaloktsüba ajanga civilian tem ki yutsür ao saka osettsüset raksaba ya mezüngmai lir. 2014 küm rara mapang Israel kanga sashia aija liasü.

Bodhbarnü sangwa akumba sülen Israel-i minute ishika tsüngta tayimtsü amshia police aser security alidak tenük yoker tesem ter dak tema nung maka

liasü, ta tenük kuli alirtemi ashir. Gaza City nung jara ama mokozi tulu lunga liasü. Tayimtsü amshia amakba ajanga Gaza City nung central police headquarter ka den iba temeket nung ki kar raksatsü, ta Haman meyong Interior Ministry ajanga ashi.

Gaza nung Palestine nunger asür nisung 35 jungogo, item rongnung tanur 12 aser tetsür asem lir, ta Health Ministry ajanga ashi. Nisung 233 shi yirua lir. Mongulbarnü aser Bodhbarnep rocket khaloktsüba agi Israel nunger tetsür asem aser tanur ka densema nisung pongu takum samaogo aser ter dak tema yiru.

Telungpur temi rara tenzüker rocket 1,050 dak tema khaloktsüogo aser 200 shi meta talangka moi Gaza nung tsük, ta Israel mitkartemi ashir. Gaza nungi Israel-i aitba drone ka khazüka yok, ta mitkartemi ashi. Infantry brigades ana iba tesemi yokogo, ta mitkar indang

odongtar Lt. Col. Jonathan Conricus-i ashi.

2014 rara mapang Israel nungertemi amshiba tasa balala rongnung nisung aliba ki raksatsüba ya ka liasü, koba tangbo International Criminal Court ajanga bushisüngdangba mapang lir.

Israel sepaitemi ozüng tesashi amshir aser raraba tesem nung international law tem shidak amshir, ta Conricus-i ashi. Gaza nung civilian asü-amaba atema kanga kumdanger aser ajemdaktsüner, ta pai ashi.

Tang tesüsa azüdokshiba ya ita ka tejaklen Jerusalem nung tenzük, kong Muslim nunger temeshi Ramadan ita mapang police temi tashiyim amshi aser Yihuda nungertemi Palestine nunger kibong ter dak tema aridoktsü amokmerenba ajanga longkak aita police den raratep. Iba tatalokba ya Al-Aqsa Mosque compound tiyongtsü sür ataloka aru, koba Yihuda aser Muslim nunger atema

temeshi tesem ka lir.

2007 küm Gaza nung Palestine sepai ket nungi Islamic telungpur teloki tashi rakzükba sülen Israel aser Hamas tsüngta rara asem tashi raraogo. Region nung aliba aser alima nung tashi tulu linüktemi telok anaprong mesüzüka khen atema rara anendaktsü.

Linük balalai iba azüdokshi aitsür, saka telok katia atsüanem akatsü bilema aliba yimya mesayur. Ato Kilonser Benjamin Netanyahu-i mapang agia tesashiba raratsü nangzüka lir.

Ajisüaka Qatar, Egypt aser United Nations ajanga ceasefire bener arutsü atema meranga inyaktepba mapang lir.

Jerusalem nung rongrong adokba ya Israel tesem ajungaleni prokshia ao aser Jewish-Arab kin temeyoktep alidak kin balala tsüngta azüdokshi tenzük. Taoba mapanga Al-Aqsa Mosque nung 2000 küm iba ama azüdokshi tenzüka küm pongu shi manenteti liasü.

Twinkle-i Hrithik aser Vidya na nem tenüngsang agütsü



alibapurtem nem teyari agütsüba atema Twinkle Khanna-i pa nem tenüngsang agütsüogo.

Twinkle-i Instagram post ka pa nem tenüngsang agütsü lemsatepogo. Hrithik indang noksa den külemi Twinkle-i, "kidanger nem teyari agütsüba dak alia pai tensa majungba mapang lenmang aisü nung teyari agütsüdar," ta zülutsü.

Source kati ashiba agi, public hospital tem nem oxygen concentrators agütsütsü atema Hrithik Roshan aser Twinkle na longjemogo, koba tang kanga nüngdaka lir.

International author aser podcaster Jay Shetty-i tenzükba fundraiser nem Hrithik-i tawa USD 15,000 agütsüogo (sen lakh 11.10 shi).

Help India Breathe ta nungja agütsür tawa Jay-i iba fundraiser tenzük aser USD million 1 bendentsü nükjiong lir, koba ajanga linük nung resource agi anüngbatem

mesemtsü. Alima nung nüngtugu nisung Jada Smith, Ellen DeGeneres, Brendon Burchard, aser Camila Cabello nung den Hrithik-ia iba fund nem tenla agütsüba Jay-i metetdaksüogo.

Taoba küma Hrithik-i ola madoki wara poktetba ajanga linük mokdang yur timtem nung alirtem nem teyari agütsüogo. Pai linük mokdang aliba mapang background dancers tem nem teyari agütsü. Hrithik-i taoba mapang pa den külemi inyakba Bollywood dancers 100 nem parnok indang account nung sen inokja liasü. Maneni pai lower-middle-class nung aliba paparazzi tem nema teyari agütsü.

Kasa mapang nung Twinkle-isa, actress Vidya Balan nem tenüngsang agütsüogo, shiba iba relief fund nem tenla agütsü liasü. Ajem ajema teyari agütsüba atema Vidya nem tenüngsang agütsü Twinkle-i, la ya sempet aika aketba tetsüka aser kanga mulungsu temulung tener aliba tetsür ka ta ashi.

Taoba ita Twinkle aser Akshay Kumar nati oxygen concentrators 100 tenla agütsüogo aser nüburttem dang pei akokba yari teyari agütsütsü mepeshia metetdaksü.

Monupii/May 12, 2021 (Agencies): Covid-19 pokteter nüburttem aika timtem nung aliba mapang actor Hrithik Roshan-i lenmang aisü nung nüngdaka

Vaio SE14, SX14 Laptops India nung sayaogo

Monupii/May 12, 2021 (Agencies): Japan nung company Vaio-i tang mezüngbuba India nung Vaio SE14 aser Vaio SX14 laptop sayaogo. Vaio laptop tasen ana ya Hong Kong nung amendaker aliba company Nexstgo-i bener aruogo, shirnoki India nung Avita notebooks dena lemsür.

Laptop anaprongla ya Amazon ajanga ayoktsü. Vaio SE14 aser Vaio SX14 nung sensors aika aser Intel CPU keter angutsü. Vaio company-i ashiba agi, laptop ana nung ya lightweight design ka atema carbon cover inokja lir aser iba den security talila atema fingerprint scanner dena inokja lir.

Vaio SE14 nung 14-inch screen den Full-HD (1,920 x 1,080 pixel) resolution aser

narrow bezels keta lir. Laptop temang ya aluminium agi yangluba saka seret 1.39 dang lir. Connectivity options tem rongnung HDMI port v1.4 at 30Hz, USB 3.2 ports ana, USB Type-C points ana den Thunderbolt support, microSD card reader ka aser headphone jack ka densema lir.

Vaio SE14 nungsa 11-gen Intel Core i7-1165G7 CPU den 16GB DDR4 RAM, 512TB SSD storage, aser Intel Iris Xe GPU inokja aliba angutsü. Tanga tongtibang feature tem rongnung backlit keyboard, security atema fingerprint reader aser 46 Watt Hour battery densema lir, koba ghonda 12 tashi amshitetsü.

India nung laptop jenjang ya sen 88,990 nungi tenzüksü aser Red Copper aser Dark Gray sentsü nung angutsü. Iba laptop

ya tang Amazon nung angutsü.

Kasa mapang nung Vaio SX14 laptop nung 14-inch non-touch display den 4K Ultra-HD resolution aser Dolby Audio-enabled speakers keta lir aser iba den Intel Core i7 CPU den LPDDR3 RAM aser 1TB SSD storage inokja aliba angutsü.

Connectivity options tem rongnung USB Type-C port ka, USB ports asem, HDMI port ka, VGA connector ka aser LAN port ka densema lir. Maneni iba laptop nung Bluetooth v4.1, fingerprint scanner aser Windows Hello face login, HD webcam, aser backlit keyboard-a keta aliba angutsü.

Vaio SX14 ya India nung sen 1,72,990 agi tenzük angutsü. Iba laptop ya khen charge asünung ghonda 14 tashi amshitetsü.

Actor Ravi Dubey dak COVID-19 putet

Mumbai, Monupii/May 12, 2021 (Agencies): Nüngtugu television actor Ravi Dubey-i pa dak novel coronavirus putetba aser kidang quarantine asüba osang sangoktsü. Arishi küm 37 tain Ravi-i Instagram sabang ajanga iba osang lemsatepa liasü.

Tesüiba anogo nung pa den ajuruteper ajak dang Covid-19 atema yakta tendangtsü asoshi Ravi-i mepishiogo.

"Kü dak iba tashidak putetba osang angazükogo aser tesüiba anogo ishika nungi kü den



quarantine süa adianutemi ni anepaludar," ta Ravi-i lemsatep.

Tang ama tensa tamajungdang, matoksatsü saka iba wara koktettsü asoshi teimla ayutsü asoshi nüburttem dang mepishiogo.

Showbiz nungi Ravi'er medemertemi iba wara nungi pa yakta taneptsü angutsü asoshi lemsatepa liasü. Star rongnung Adaa Khan, Pulkit Samrat, Asha Negi, Karan Patel aser Karanvir Bohra nungeri Ravi atema bilemja yakta taneptsü angutsü lemsatepa liasü.

MEJEMBITETBA TEPELA LEMSATEPER



Wb. Lipokchuba (Merangkong)

Ozü temeim kinungbo aser obala asür Lipokchuba (Merangkong) mapang tatsüka shiranga yipten nung alidang nungi tenzük pa asüba 7th May, 2021 anogo tashi nung shirnokisa nübo, rongsen aser taküm mapang tenla tulu agütsüogo, nenok ajak den onoki tebang agi meshitetba tepela tulu, tsüngdong marutet nung, iba zülü ajanga lemsateper.

Tongtibangsa pa temang tashidak den repa tensa wara Covid-19 agi menepa iba akümüli tongpang renemogo. Aji oda, ozü den asükhuret lemsateper kwika quarantine nung lir, Tsüngremi nenok ajak nem tesünep den taküm nüngdak ajak moajangma ta ozü sarasadem den temulungjang taroktiba nungi nemjema bilemba lemsateper.

Teyari balala agütsürtem tenüng zünger mezüngmatsü, saka lokti kar tenüng meshii melitetbayong yangi shisemer :

1. Merangkong Senso Telongjem Dimapur
2. Merangkong Senso Telongjem Chumukedima
3. Chumukedima Tamang Telongjem (Fellowship), Merangkong
4. Mr. Lipokyangar MGM Touring Missionary.

Ano yangi mezülusemba aika lir, nenok ajak dangi tsüngdong marutettsü saka iba osangkaket ajanga mejembitetba tepela nenok ajak den lemsateper. Tsüngremi nenok taküm aser mapa tali moajangma.

- Temeim kinungtsü, chirnur aser kinungertem.

Mulungnen O



ASO :
16 January 1933

ASÜ :
6 May 2021

Asür Sobulepük (Chuchuyimlang) akümüli nungi pila orr onok , mangyima alidang shirnokisa ozü den nübu rongsen, shisatsü aser sarasadem agi yaritepogo, nenok ajak dang kanga pelaba lemsatper. Tsüngremer talubo temoatsü agi nenok ajak meyipa moajang ta sarasademsür.

Temeim Chirnurtem, Anü-apang aser Semchirtem

OFFICE OF THE
ANAKIYIMSEN MEDEMSANGER PUTU MENDEN
P.O. TZÜDIKONG TOWN
Pin : 798623, Dist. Mokokchung : Nagaland.

Pelaba Lemsateper

Late. Mr & Mrs. Mendenlepük-er jabaso Mr. Limatemjen Lemtur (Anaki), pai Secretariat Assistant (SA) mapa asoshi NPSC Exam 2021 nung takok tulu anguba asoshi Anakiyimsen Yimden, Students aser Yimer yimsanger ajaki pa nem tenüngsang tulu agütsür.

Tsüngremi pa taküm aser mapa nübortem asoshi maneni moajangma.

Sd/-
Mendennukshi, Chairman
Village Council Anakiyimsen

Sd/-
Shilutenzuk Yaden, Secretary
Village Council Anakiyimsen

WC qualifier atema team yoktsü Qatar nungi temelaba atadar: AIFF

New Delhi, Monupii/May 12 (Agencies): All India Football Federation-i Bodhbarnü, COVID-19 tashidak kanga kara menatepyonga aoba ajanga national team linük nung training magiteti lir, anungji taruba ita Qatar nung World Cup qualifying round asayatem masaya tsüingda bendanglen oa camp ka akatsü asadangdar, ta ashi.

India team 2022 FIFA World Cup atema qualify asütsü timla mali saka 2023 Asian Cup atema qualifiers nungbo densemsü timla lir. Qatar (June 3), Bangladesh (June 7) aser Afghanistan (June 15) den asayatsü aliba tanungba asaya asem ya Asian Cup qualification atema kanga tongtibang lir.

Coronavirus wara ajanga senzusenpong aser quarantine dak sendakba nung tetsükdaktsü adoker aliba ajanga Group E nung tanungba asaya ajak Qatar nung dang asayatsü atema Asian Football

Confederation-i March ita telemtetba agia liasü. "India nung camp ayongzüka magitettsü. Anungji tangalen oa agitsü atema asameyangtsüla," ta AIFF General Secretary Kushal Das-i PTI dang ashi.

Head coach Igor Stimac lenisüba nung national camp ka Kolkata nung May 2 nungi 21 tashi agitsü renemer liasü. Iba sülen team May 22 nü Dubai-i oa idakji hopta ka tepeyong camp ka akatsü aser international masü saka friendly match tema asayatsü sentong yanglur liasü.

Ajisüaka India nung COVID-19 wara kanga sashia prokshia aoba ajanga iba sentong athitsüsa aküm. AIFF-i, Qatar nung asayatsü aliba asayatem thinenttsü atema mepeshiba AFC-i magizük.

Qatar-i jelia team yoktsü kecha sentong ali mali ta asüngdangba mapang Das-i, "temelaba angunung dang

yoktettsü. QFA (Qatar Football Association) nungi osang atadar," ta ashi.

Paisa, temelaba ngura, Qatar atongba sülen team quarantine mesüdaktsütsü atema AIFF-i mepeshitsü, ta ashi.

India team tang parnok telok nung jenjang pezübuba nung lir. Parnoki asaya pongu nungi point asem nguteta lir.

Tanungba asayatem nung team-i takok tashi points bendena tasembuba jenjang nung tembangtsü merangtsüla, ajita asüngdang 2023 Asian Cup qualifying third round atema indang indanga qualify sütettsü.

2019 küm November ita sülen India team March ita mezüngbuba Oman aser UAE den Dubai nung friendly asayaogo.

March 25 nü Oman den asaya goal 1-1 nung tembang saka March 29 nü UAE-i goal 0-6 agi India team akok.

Sai Praneeth Singapore Open nung shilem magitsü



Monupii/May 12, 2021 (Agencies): Anogo 21 quarantine asütsü atema nongnangba sülen B Sai Praneeth-i Singapore Open nung shilem magitsü atema telemtetba agi, ajisüaka June 1 nungi 5 tashi asayatsü aliba iba asayamung thinenogo.

"Anogo 14 dang quarantine asüyonga masayateter aser tangbo anogo 21 quarantine asütsüsa akümtsü. Practice melei asayatsü kanga tasak," ta Praneeth-i ashi.

Tetsü tarep asayar Ashwini Ponappa-Sikki Reddy nata iba asayamung nung shilem magitsü atema telemtetba agiogo aser iba ajanga Olympics atema qualify asütsü timla aliba samaogo. Tebur tarep asayar Satwiksairaj Rankireddy aser

Chirag Shetty nata iba asayamung nung shilem magitsü telemtetba agir liasü.

Singapore nung India nung asayatem anogo 21 quarantine asütsüla, kong India nungi aruba tayimtsü ajaka nokdang lir.

Praneeth, vaccine mezüngbuba dose bo agiatokogo, saka iba jaki India nungertem linük aika nung senzusenpongtsü tenokdangba agütsür aliba meperidaktsür. "India nung ka ama vaccine agir aliba status ya senzusenpongtsü mesera quarantine masütsü atema mepeshitsü asoshi teperi masü," ta pai ashi.

Telangana ajunga May 12 nungi tenzüka anogo 10 mokdanga ayutsü anungji Sai Praneeth training magi atatsü. "Malaysia aser Singapore nung asayamungtem atema ni mapang talangka renema liasü, saka iba asayamung ana nung shilem magitettsüsa akümbsa sülen Olympics atema renemshi tenzükttsü ta bilema liasü. Ni hopta 7 kanga meranga training agiogo anungji mapang tatsüka atema anisüngzüik nung ajungtsü ta bilemer," ta paisa shisem.

Japan-i Olympic nung asayatsüpurtem nem vaccine agütsütsü

Monupii/May 12, 2021 (Agencies): Tokyo Olympics matong tsüingda Japan nung Olympic nung asayatsü purtem ajak nem vaccine agütsütsü sentong lir, ta domestic media sangdong ka ajanga Bodhbarnü metetdaktsü. Japan nung vaccine kanga meyilongi agütsüba atema sorkar kanga nongshia aliba mapang iba jenjang agiba ajanga asayatem ya ajak dang nungi tongtibangba kümaktsütsü.

Olympic organisers mesera Japan indang Olympic Committee nungi Nikkei aser Yomiuri osang kakat nung sangdongba osang dak sendakba nung kecha telangzüba magütsü.

Osang kakat ajanga ashiba agi, asayar aser coach densema

nisung 2,500 nem vaccine agütsütsü, koba Japanese sports federations-i anepalutsü.

Japan sorkari nüburtem nem vaccine magütsü tsüingda asayatem nem vaccine agütsütsü asoshi kecha sentong mali ta shiogo.

Iba ita tetenzüklen US nung mozü yangluba company Pfizer aser parnok indang German partner BioNTech-i, Tokyo Games nung tokteptsüpurtem aser staff tem nem vaccine agütsütsü atema International Olympic Committee den tenangzüktepba ka yangluba sangdonggo.

Parnoki ashiba agi, Olympics nung shilem agitsüpurtem nem May tatemlen nungi vaccine agütsü tenzükttsü. Ajisüaka koba team nem agütsütsü iba indang

osang tejangja magütsü.

Japan nung Pfizer vaccine amshitsü temelaba agütsüogo aser vaccine kanga meyilongi agütsüba atema sorkar kanga nongshia arudar.

Tang tashi nungbo medical worker tem aser tantsür tamburtem nem dang vaccine agütsüdar aser nüburtem ajak nem kodang agütsütsü iba indang osang tejangja mali.

Olympics ya hopta 10 shi dang lir tenzükttsü saka Japan nung aikati iba asayamung ayongzüka asayatsü memulunger.

Ajisüaka asayamung ayongertem atema anisüngzüik kaji asayamung atema volunteer 200 nungdaker saka doctor 280-i parnok tenüng agütsüogo, ta Kyodo news agency-i Bodhbarnü metetdaktsü.



Olympic nung asayatsü aliba boxer Mary Kom shiba dang 'Queen of Boxing' ta ajar la tanü Command Hospital, Pune nung COVID-19 vaccine dose mezüngbuba agiba noksa nung angur.

Van Dijk Euros nung shilem magitsü

Monupii/May 12, 2021 (Agencies): Liverpool aser Netherlands defender Virgil van Dijk-i, taruba ita asayatsü aliba European Championship nung shilem magitsü atema telemtetba agiogo. Pa temekok yirur aliba kanga junga anepalutsü atema iba telemtetba agia liasü.

Van Dijk, shiba Premier League nung Everton den asayaba mapang October ita yirua liasü, pa surgery agiba sülen tang tashi masayateti arudar aser arishi küm 29 tain asayar yagi ashiba agi, Euros nung shilem magitetba atema pa kanga tezü adanger.

"Temang jenjang asadangra

Euros nung shilem magitsü atema telemtetba agiba ya shidak ta bilemer aser off-season mapang temang kanga junga anepalutsü," ta pai Liverpool website dang ashi.

"Auh Euro nung shilem magitetba atema kanga tezüdanga bilemer. European Championship nung linük team anir masayatetba atema tezüdanger saka kechi atalokogo aji agizüktsüsa akümer," ta pai ashi.

European Championship nung Netherlands Group C nung Ukraine, Austria, North Macedonia den ataa lir aser group games asem Amsterdam nung asayatsü renema lir.



Portuguese League nung Boavista FC goal 1-0 agi koka asayamung akokba sülen Sporting CP captain Sebastian Coates (teyong)-i takok marok ajungketer asayatem ajak pelatepba noksa nung angur.

BILEMDANGANG

"Alirongsen takaba ajak agi nisung taküm ka malizüktettsü."